

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut danskit inatsisit attortinneranut ministerianut attaveqassasut Kalaallit Nunaanni Eqqartuussiveqarneq pillugu inatsip allanngortinneqarnissaa pillugu. Allannguut periarfissaqartitsilissaaq hashimik pinerluttoqarsimatillugu aamma allatigut peqqarniitsumik pinerluttoqarsimatillugu, politiit ilisimannittunik illersuinnissannut, taamaaliornikkut unnerluussanut taassumallu illersuisuanut ilisimannittup aqqanik kallerriussinngissinnaallutik.
(Atassutip Inatsisartunut ilaasortaataitai)

Akissuteqaat

(Isumaginninnermut, Ilaqutariinnermut, Naligiissitaanermut Inatsisinullu Atuutsitsinnermut Naalakkersuisoq)

Aappasaaneerneqarnera

Siullermik Naalakkersuisut Inatsisinut Ataatsimiititaliaq, inatsisartut aalajangiiffigisassaattut siunnersuummut matunnga peqqissaartumik suliarisimanerannut, qujaffigiumavaat.

Hashi pillugu suliani, pinerluttulerinermilu suliani sakkortunerpaani, unnerluutigineqartumut, taassumalu illersuisuanut, ilisimannittutut kinaassutsimik isertuussisinnaaneq siunnersuutip periarfissaqalersissavaa.

Siunnersuummi tunngavigineqarpoq, ilisimannittut nalunaaruteqarnissaminnut imaluunniit pinerluttumut ilisimannittutut uppersaanissaminnut, pillaatitut akiniarneqarsinnaanermik qununeq pissutigalugu, tunuarsimaalersinnaanerat. Siunnersuuteqartoq malillugu hashimik pinerluuteqartartunut tunuliaqutaasut innuttaasut amerlasuut kikkuuneri nalunngilaat. Taamaammat hashimik pinerluuteqartarneq akiorniarlugu siunnersuuteqarnikkut anguniarneqarpoq, innuttaasooq inuunermik peqqissutsiminilluunniit ernumassuteqarani pinerluuteqartut pillugit nalunaarutiginnissinnaalernissaa.

Siunnersuut Inatsisinut Ataatsimiititaliamut ilungersunartunik isumaliutissanik suliakkiivoq. Inatsisinut Ataatsimiititaliap isumaliutissiissutaanni takuneqarsinnaavoq tunngaviummik inatsisitigut illersugaanerup, inatsisitigullu aaqqissuussaanerup tunngavia unioqqutinneqassanersut ernumanartoqartoq, pingaartumik kimit nalunaarutigineqarsimanerluni ilisimannikkaanni naleqqulluartumik illersorteqarsinnaanermut periarfissaq annaaneqarsinnaammat. Ernumassutit aappaattut taaneqartoq tassaavoq, piviusunngortitsinermi kinaassutsimik isertuussisinnaanerup qulakkeernissaa annertuumik ajornakusoorsinnaasooq illoqarfinni minnerusuni nunaqarfinnilu.

Inatsisartut inatsisinut ataatsimiititaliaat taamaammat allannguutissatut siunnersuummik saqqummiussaqqarpoq. Inatsisinut ataatsimiititaliap siunnersuutigaa, innuttaasut politiit qarasaasiakkut nittartagaat atorlugu kinaassuseq taanngikkaluarlugu politiinut nalunaaruteqarsinnaassasut.

Kalaallit Nunaanni politiit, Danmarkimisulli taamatut periarfissaqartitsinngillat, attavigineqarsinnaanermut immersugassaqqanngilaq, taamaalilluni innuttaasunut periarfissatuaalluni kinaassutsimik isertuussilluni email-ikkut saaffiginnissuteqarsinnaaneq.

Naalakkersuisut Inatsisartut Inatsisinut Ataatsimiititaliaata isumaliutissiissutaa paasissutissatut tiguaat. Oqaaseqaataasut tunngavigalugit ataatsimiititaliaq allannguutissatut siunnersuummik saqqummiussaqaarpoq, taassumalu kinguneraa Naalakkersuisut naalagaaffimmi oqartussaasunut oqaloqatiginninnissaannik peqquneqassasut, anguniarlugu innuttaasut kinaassutsiminnik isertuussillutik politiinut paasissutissanik tunniussisinnaanerannut periarfissaasa erseqqissaavigineqarnissaat, politiit nittartagaat aqutigalugu, paasititsiniaanikkut il.il.

Naalakkersuisut inatsisinut ataatsimiititaliap ernumanerat isumaqatigaat, allannguutissatullu siunnersuut taperserlugu.

Tamakku tunngavigalugit Naalakkersuisut inassutigaat Inatsisinut Ataatsimiititaliap allannguutissatut siunnersuutaa akuersissutigineqassasoq.